

## **Franskisut aallarterlaanut B - 2022**

### **1. Ilinniartitsissutip inissimanera**

Franskisoorneq piginnaasassanik ilinniartitsissutaavoq, ilisimasassanik ilinniartitsissutaavoq kulturimillu ilinniartitsissutaalluni, ilaatigullu europami nunallu tamat akornanni nalinginnaasumik attaveqatigiinnermi ilaatigullu paasisaqartarnermut franskisut oqaasii atorveqartarlutik aammalu romamiut oqaasiinik kulturiannillu paasisaqarfiulersarlutik. Aammattaaq Frankrigimi nunanilu allani franskisut oqaluffiusuni kulturi, oqaluttuarisaaneq inuiaqatigiinnilu pissutsit ilinniartitsissutip imarai. Ilinniartitsissummi periuseq tassaaneruvoq attaveqatigiinnermi oqaluttarissanik sulinermilu oqaasertanik atuineq.

### **2. Ilinniartitsissummi siunertat**

*Ilisimasat piginnaasallu:*

Ilinniartut franskisut oqaasiinik imatut ilisimasaqartigissapput oqaatsinillu imatut piginnaasaqartigissallutik franskisut paasisinnaallutik, ajornanngitsumillu imminnullu atasunik oqalussinnaallutik attaveqateqarsinnaallutillu. Ilinniartut franskisut oqaasilinni inuiaqatigiinnik taakkualu kulturiannik ilisimasaqassapput paasinnillutillu.

*Ilikkagaqartarnermi sulinermilu piginnaasat:*

Ilinniartut aallussillutik aaqjissuussamillu oqaatsinik piginnaasaqalerniarnermi sulisinnaassapput aammalu atuarneq, tusarnaarneq, oqaatsinik atorsinnaasaqalerneq oqaatsinilu oqaasilerinerup aaqjissuussaanerata paasisaqarfiginiarnera aqutugalugit oqaatsit atorlugit sulisinnaassallutik.

*Inuttut inuillu akornanni attaveqatigiittarnermi piginnaasat:*

Nammineq ilinniariaatsit ilinniagaqalernermilu piginnaasaqalerneq ilinniartut paasisimassavaat. Ilinniartut ilinniartitsissutini ilinniagaqarnermilu nammineersinnaassuseqassapput aammalu marlukkaarlutik suleqatigiiaarlutillu sulisinnaassallutik.

*Kulturikkut inuiaqatigiillu akornanni piginnaasat*

Ilinniartut namminneq kulturertik franskisut oqaluffiusuni allani kulturinut sanilliullugu isummerfigisinnaasavaat, tassungalu atatillugu Kalaallit Nunaanni nunanilu franskisut oqaluffiusuni marlunnik oqaaseqarfiusuni marlunnillu kultureqarfiusuni peqataanermi assigiissutsit assigiinngissutsillu isumaliutigisinnaassalugit.

### **3. Ilikkagassatut anguniakkat imarisaalu**

#### **3.1 Ilikkagassatut anguniakkat**

Ilinniartut ukuninnga piginnaasaqassapput:

- a) Sammisat ilisimasat aamma nalinginnaasut tusagassiuutillu assigiinngitsut aqqutigalugit tusagassiarineqartut ajornanngitsumik franskisut oqaluttoqartillugu pingaarnertut imarisaat paasisinnaassavaat,
- b) sammisat ilisimasat nalinginnaasullu pillugit franskisut ajornanngitsumik imminnullu atasunik oqaloqatigiinnermi peqataasinnaassapput,
- c) franskisut oqaatsit ajornanngitsut atorlugit pisimasulersaarluni atuakkiaat aammalu suliat pillugit allaatigisaat suliareqqaarneqarsimannigisut atuarsinnaassavaat imarisaalu pingaarnertut paasisinnaassallugit,
- d) sammisat ilisimasat franskisut ajornanngitsumik imminnullu atasunik oqaluinnarlutik nassuiarsinnaassavaat,
- e) sammisat ilisimasat aamma nalinginnaasut franskisut ajornanngitsumik imminnullu atasunik allattariarsorlutik oqaatisiginnaassavaat,
- f) franskisut oqaloqatigiinneermi suliaqarnermilu Frankrigimi franskisullu oqaluffiusuni kulturikkut inuiaqatigiinnilu pissutsit sammisaqarluni ilinniarnermi ilisimalikkatik atorsinnaassavaat,
- g) Frankrigimi franskisullu oqaluffiusuni kulturikkut inuiaqatigiinnilu pissutsit ilisimalikkatik allani kulturikkut inuiaqatigiinnilu pissutsinut naleqqiussinnaassavaat,
- h) ulluinnarni sulineri nunat allamiut oqaasiinik qanoq ilinniartarneq pillugu ilisimasatik atussavaat,
- i) oqaatsit marluk atorlugit ordbogit aammalu franskisut oqaasilerinerit ajornaatsut atussavaat.

### **3.2 Ilinniartitsissutip imarisai pingaarnertut**

Ilinniartitsissutip imarisai pingaarnertut tassaapput:

- a) oqaloqatigiinnerit oqaaseqatigiillu aqqiussuusaanerit pillugu aamma oqaaseqatigiilerineq pisariaqartoq oqaatsillu ilusii oqaatsit nipaannut pingaaruteqartut pillugit oqaatsit ilusilersiornerat atorneqarnerannilu tunngaviummik tunngaviit
- b) tunngaviummik oqaatsit atorsinnaasat oqariartaatsillu immikkut ittut ilinniartut sammisat nalinginnaasut sammisallu ilinniakkat pillugit oqaloqatigiinnermi atorsinnaasat,
- c) franskisut tunngaviummik taaguusiineranni oqalunnerminnilu erinaanni immikkoortut, ilikkaruminartut ilikkaruminaatsullu,
- d) Frankrigimi nunanilu allani franskisut oqaluffiusuni ullutsinni oqaluinnarluni aamma atuakkiani atuakkiaannigitsunilu taaguuseeriaatsit,
- e) oqaluttuarisaanermi, kulturimi kulturillu akornanni pissutsit, sammisanut ilinniakkanut tunngassuteqartut aamma
- f) Frankrigimi inuiaqatigiinni pissutsit pingaarnertut.

Oqaasertat siammasinnerusut atorneqarnissaat aallaaviuvoq. Oqaasertat multimodalit piviusunik pisuusaartitsinernillu suliat pingaarnertut ilikkagassanut ilaatinneqartut franskisut allaqqassapput annermillu suliareqqitaasimassanatik.

### **3.3 Ilassutitut ilinniakkat**

Ilinniartut taamaallaat pingaarnertut ilinniakkat atorlugit ilikkagassatigut anguniakkat angusinnaassanngilaat. Ilassutitut ilinniakkat tassaapput nunani franskisut oqaluffiusut aallaavigalugit kultureqarnermi, atuakkiortarnermi, oqaluttuarisaanermi inuiaqatigiinnilu oqariartaatsit assigiinngitsut. Ilinniakkani ilinniakkat pingaarnertit itisilerneqassapput takussutissiorneqarlutillu aammalu ilinniartut ilinniakkami paasisaqarnerulersinneqassallutik, taamaalilluni ilikkagaqartarnermi anguniakkat anguneqassallutik. Pingaarnertut ilinniakkatuulli ilassutaasumik ilinniakkat sapinngisamik annertunerpaamik Kalaallit Nunaanni nunallu tamat akornani pissutsini takussutissiorneqassapput.

## **4. Ilinniartitsinerup aaqqissuunneqarnera**

### **4.1. Ilinniartitseriisimi periutsit**

- a) Ilinniartitsinerni ilinniartut ilinniakkani qaffasissusiat ilisimasaallu aallaavigineqassapput.
- b) Ilinniartitsineq imatut aaqqissuunneqassaaq ilinniartitsisut ilinniartullu akornani ilikkagaqartarnermi oqaloqatigiittarnerattut sapinngisamik isikkulerlugu.
- c) Ilinniartitsineq imatut aaqqissuunneqassaaq ilinniartitseriaatsit assigiinngitsut paarlakaajaanneqassallutik.
- d) Ilinniartitsineq imatut aaqqissuunneqassaaq ilinniartut soqutigisaat pisariaqartitaallu isiginiarneqassallutik, taaamaalilluni ilinniartut ilinniartitsissutip pissanganartuuneranik, naleqquttuuneranik soqutiginarartuuneranillu misigisaqarnissamut periarfissinneqassallutik.
- e) Ilinniartitsineq imatut aaqqissuunneqassaaq ilinniagaqarnerup ingerlanneqarnerini ataasiakkaani sammisanilu ineriartortitsinermi ilinniartitsissut siuariarfiussalluni, tassa ilinniartitsissummi oqaatsit oqariartaatsillu ineriartorfiussallutik, taamaalilluni ilinniartut namminneerlutik suliariaaseqarnissamik ajornakusoortunillu eqqarsartarnissamut piffissap ingerlanerani sungiusarneqassallutik.
- f) Ilinniartitsineq imatut aaqqissuunneqassaaq inuiaqatigiinnut avatangiiserisanut annertunerpaamik attuumassuteqalersillugu.

### **4.2 Suleriaatsit**

Ilinniakkatigut siuariartorneq ilinniartitsinermi qitiuvoq. Aallarterlaanut ilinniartitsereernerup kingorna sammisat assigiinngitsut pingasut tallimat atorlugit sulineq aaqqissuunneqassaaq, ilikkagassatullu anguniakkat tassani ilanngunneqarnissaat qulakkeerneqassalluni. Suleriaatsit assigiinngiaartitsineq siuariartornerlu isiginiarniarlugit toqqarneqassapput, aammalu ilinniartut attaveqartarnermik piginnaasaasa ineriartortinneqarnissaat siunertaralugu suleriaatsit ataqatigiissitsisut atorneqanerusussallutik. Ilinniartitsissummi ilinniannakkat atorneqarfissaat isiginiarlugu pingaartumik ilikkagassatut anguniakkat naapertorlugit ataatsimoortutut misigineqassapput.

Ilinniartut attaveqatigiittarnermi piginnaasaasa ineriartortinnissaannut pisariaqartunik oqaatsinik atugaqarsinnaalissapput, ilinniartitsinermilu qitiupput ilinniartut namminneq oqaasiliorsinnaanermut periarfissaqarnissaat ilikkagassatullu anguniakkanut tuungatillugu iliuuseqarsinnaanissaat. Oqalussinnaaneq oqaatsit eqqortumik atornissaannit pingaartinneqarnerussaaq. Tusarnaarnermi, atuarnermi attaveqatigiinnermilu periutsinik ilaatigut ilisimasaqarnikkut ilinniartut oqaloqatigiinnermik aallartitsinissaanni ingerlatitsiinnarnissaannilu sakkussamik tunineqassapput. Oqaasilerineq, oqaasertanik nalilersuineq nunallu allamiut oqaasiinik ilisimasaqalerneq naleqquttumik annertussusilimmik ilinniakkamilu siuariartornissaq isiginiarlugu ilanngunneqassapput. Ilinniartitsineq sapinngisamik annertunerpaamik franskisut ingerlanneqassaaq.

Oqaluinnarluni franskisut paasinnineq qulakkeerneqassaaq tusagassiutit assigiinngitsut atonerisigut oqaatsinik ingerlatitseqqiinnermik ilinniartut tusarnaarnerisigut. Frankigimi kulturi inuiaqatigiinnilu pissutsit ilinniarnermi ingerlaavartumik ilanngunneqartassapput. Allattariarsorneq oqaluttariarsornermut tapersiutitut killilimmik ilanngunneqassaaq.

#### **4.3 It**

Ilinniartut aallaqqaataaniilli it atorlugu suleriaatsinik ilinniartinneqassapput. It ilinniartitsinermut ilaavoq, aamma allalluni oqaluttariarsorlunilu attaveqatigiinnermut paasissutissiinermullu, paasissutissanik ujarlernermit aamma oqaatsitigut pisinnaasat inerisarnerannut misilerarnerannullu ikorfartuutitut atorneqassalluni. Oqaatsinik suliaqarnerup, It-p aamma suleriaatsit aaqqissuunnerat imminnut ataqatigiinnerat ataatsimoortutut isigineqassaaq.

#### **4.4 Ilinniartitsissummi oqaatsit**

Ilinniartitsineq imatut aaqqissuunneqassaaq ilinniartut ilinniartitsissumi oqaatsinik aammalu ilinniartitsissummi oqariaatsinik paasinnittarnerat atuisarnerallu aaqqissuussamik ineriartortinneqarluni. Ilinniartitsineq imatut aaqqissuunneqassaaq ilinniartitsissutit siulianni oqaatsinik oqariaatsinillu ilinniartut piffissap ingerlanerani paasinnillaarsinnaatikkiartortillugit atuisinnaalluatiikkiartortillugillu.

#### **4.5 Ilinniartitsissutinut allanut atassuteqartitsineq**

Ilinniartitsineq imatut aaqqissuunneqassaaq piffissat ilaanni ilinniartitsissutit akornanni suliaqartoqartarluni aammalu ilinniartitsissutini allani ilisimasaqarfiusunut sanilliussisoqartassalluni. Ilinniartitsissut alla ataaseq arlallillunniit suleqatigiiffinerisigut ilinniartitsissutit akornanni suliniut minnerpaamik ataaseq suliarineqassaaq. Ilinniartitsissutit soorlu oqaluttuarisaaneq, kulturilerineq oqaatsinillu ilinniartitsissutit allat suleqatigiissuteqarfigneqarluarsinnaapput. Piffissap suliniuteqarfiusup kingorna ilinniartitsissutinut uppersaat ataatsimoorussaaq tunniunneqassaaq.

### **5. Nalilersuineq**

#### **5.1 Ingerlaavartumik nalilersuisarneq**

Ilinniartunik ataasiakkaanik ilitersuisarnikkut aammalu militsinnerit, misissuinerit imminullu nalilersortarneq atorlugit ilinniartut ataasiakkaat ilinniarnep tamarmiusup ingerlanerani ilinniakkami killiffiup qaffasissusianik ineriartorfiuneranillu ersarissumik misigisaqassapput. Ingerlatat ilinniartisinermi pissarsiat pillugit ilinniartut ataasikkaat ataatsimullu qisuariartarnissaannik ineriartortitsisut ilanngunneqassapput. Ilikkagassatut anguniakkat nalilersuisarnerni tunngaviussapput. Nalilersuisarnerni siunissaq tunngaviussaaq.

## **5.2 Misilitseriaatsit**

Franskisut allaatigisami oqaasertamik ilisimaneqanngitsumik suliareqqaarnikuunngitsumillu qupperneq ataaseq angullugu nalinginnaasumik annertussusilimmik suliaqarneq tunngavigalugu oqaluttariarsorluni misilitsitsittoqartassaaq. Oqaasertaq sammisamat ilinniakkamat ataatsimut tunngassuteqassaaq. Suliassat aamma sammisat nalinginnaasut pillugit assimik nalusamik imaqaassapput. Soraarummeerneq immikkoortunik marlunnik imaqarpoq. Misilitsinnermi immikkoortoq siulleq tassaavoq ilinniartup nassuiaanera aammalu itisiliilluni franskisut oqaloqatigiinneq kiisalu oqaasertanik paasinninnermik misiliineq. Misilitsinnermi immikkoortup aappaa tassaavoq asseq aallaavigalugu franskisut oqaloqatigiinneq. Piareersarnissamat 60 minutsit missaanni piffissaliisoqassaaq, soraarummeertumullu ataatsimut soraarummeerneq 30 minutsit missaanni sivisussuseqassaaq.

Qupperneq nalinginnaasoq allaatigisanut tunngatillugu tassaavoq qupperneq naqinnernik akunnequsikkanik 2400-nik imaqartoq, taallanut dramamullu tunngatillugu titarnerit 30-t, elektroniskimik tusagassiissutitigut atortunut tunngatillugu minutsit pingasut.

## **5.3 Naliliinermi tunngaviit**

Soraarummeertut suliaqarnerminni ilikkagassatut siunertanik qanoq malinnitsiginersut nalilersuinermi nalilernerqassaaq. Soraarummeertut oqaasertanik ilisimanngisanik franskisut nassuiaanissaat aamma sammisani ilinniarfiusuni franskit sumiiffillu franskisut oqaluffiusut kulturiannut, atuakkiannut inuiaqatigiivinnullu tunngasut pingaartinneqassapput. Aammattaaq sammisat nalinginnaasut oqaasertanillu paasinninneq pillugit oqaloqatigiittarnermi piginnaasat pingaartinneqassapput. Imminut atasumik oqaatsinik atuisinnaaneq immikkoortualunni eqqortumik saqqummiinermi pingaarnaruvoq.

Ataatsimut nalilersuineq tunngavigalugu karakteriliisoqassaaq.